

Usvojen dokument Prioriteti u oblasti ljudskih prava za 2002. godinu

Visoki predstavnik Wolfgang Petritsch, ministar za ljudska prava i izbjeglice BiH Krešimir Zubak, šef Misije OSCE-a u BiH Robert Beecroft i predstavnici drugih međunarodnih organizacija, te institucija za ljudska prava BiH i domaćih nevladinih organizacija, danas su se sastali u OHR-u i tom prilikom pregledali i usvojili dokument "Prioriteti u oblasti ljudskih prava u BiH za 2002. godinu", koji je sastavio Koordinacioni centar za ljudska prava.

"Prioriteti za 2002. godinu" predstavljaju kombiniran pregled aktivnosti i događaja iz prethodne godine, koji su izradile međunarodne organizacije u BiH, te, na osnovu ovog pregleda, dogovoreni akcioni plan koji identificira prioritete za tekuću godinu.

Pet prioriteta koji su identificirani za ovu godinu su: održivi povratak, obrazovanje, reforma policije i sudstva, jačanje kapaciteta domaćih partnera i zaštita manjina od diskriminacije.

Visoki predstavnik je konstatirao da se ove godine moraju poduzeti dodatne mjere kako bi se osigurala održivost masovnog povratka čija je stopa znatno uvećana u posljednja 24 mjeseca. Povratnici moraju imati potpun i jednak pristup obrazovanju, zapošljavanju, socijalnim i komunalnim službama, ne smiju biti izloženi progonima i moraju imati povjerenja da će im policijski organi, sudstvo i vlasti pružiti zaštitu i štiti njihova prava.

Iako je u posljednje vrijeme situacija bitno poboljšana, poštivanje vladavine zakona i osnovnih ljudskih prava u BiH još uvijek je na niskom nivou. Prijem BiH u Vijeće Evrope

krajem ovog mjeseca uključuje obavezu uspostave demokratičnijeg načina upravljanja, kao i poštivanja ljudskih prava i vladavine zakona. Prijem predstavlja obavezu države BiH i entitetskih organa vlasti da ulažu još ozbiljnije napore na osiguravanju i očuvanju osnovnih sloboda i ljudskih prava. Ova obaveza čini i sami osnov Ustava BiH, koji sadrži međunarodno priznate konvencije o ljudskim pravima.

Visoki predstavnik je pozdravio ustrajne napore koje u ovoj oblasti čine domaće institucije, a posebno Ministarstvo za ljudska prava i izbjeglice BiH, konstatirajući da "međunarodna zajednica ima produktivan partnerski odnos sa ovim ministarstvom i ministrom Zubakom. Zaštita ljudskih prava građana je najvažnija oblast u kojoj treba preuzeti odgovornost".